



Minggu, 07 Nopember 2021

Ogen: Esekiel 20: 1-16



Dibata mpetangkas diriNa



Erbage-bage cara i bas Dibata petangkas diriNa. I bas Padan Si Ndekah pernah Dibata mpetangkas diriNa alu api. Banci ka alu ranan dengen padanNa. Nandangi Bangsa Israel Dibata enggo mulih-ulih erpadan guna nelamatkan dengen mabai bangsa e ku negeri si ipadankenNa. Tapi, ban Bangsa Israel e la setia nandangi Tuhan, mekatep jadi kiniulin Dibata e la sahun isehkenNa. Adi bangsa e patuh i je me tuhu-tuhu Dibata mabai bangsaNa e ku negeri si enggo ipadankenNa man nini-ninina.

I bas ayat 8 isuratken maka bangsa e tuhu-tuhu la megiken Kata Dibata, labo ia nggit ngambekken gana-gana sesembahenna e. Emaka nembeh kal ate Dibata man bangsaNa e tapi la mungkin iukumNa bangsaNa e bas negeri kalak si deban. Sabap enggo pernah ibelaskenNa maka ibabaNa mulih nge bangsaNa e arah taneh perkawanan nari.

Dibata eme Dibata si setia, si rusur nggit mpelimbarui perpadanenNa man bangsaNa Israel. Amin gia bangsa e lanai megiken kata, tapi iusur-usur Tuhan mereken padanNa man baNa. Isuruh Tuhan ia ngehamati wari sabat guna meteh dengen nginget maka Dibata kap si ngarak-ngarak kegeluhen bangsaNa. Emaka nandangi kesusuren bangsa e me ia ngerana tole gelah jadi bangsa si patuh dengen setia man Tuhan.

Dibata nehken keleng ateNa man banta alu erbage cara. IpetangkasNa banta kerna diriNa alu erbage-bage peristiwa i bas kegeluhenta. Sada tujunNa gelah sitandai IA, Dibata si erkeleng ate man banta. Amin gia kita enggo rusur ngelakoken dosa ras pelanggaren, tapi ersura Dibata gelah kita mulihken jadi kalak si setia man baNa. Kai si ngena ate Dibata silakoken erpalasken teks sendah enda? E me ngikutken undang-undang Tuhan dengen mpebadiaken wari sabat guna mpermuliaken Tuhan Dibata si mada dengen singaturken kegeluhenta.